

ARLeF: lavorâ cu la lenghe furlane – inviât il cors. Al è il prin intal so gjenar.

Realizât in colaborazion cu la IRES FVG, al è un percors formatîf che al pronte ae profession.

Al à cjatât une vore di interès il cors “**Tecnichis di promoziun linguistiche e culturâl furlane**” organizât de IRES FVG Impresa Sociale e **nassût dal confront cu la ARLeF, ideadore e ancje partner dal projet.**

Finide la fase di selezion dai candidâts, **il cors si à inviât in chestis zornadis in modalitât in linie**, ma di Setembar lis leziuns a saran tignudis in aule, par un totâl di 240 oris. Il cors - che si inserìs intal ambit dal Program Specific 64/2018 dal Por Fse Fvg 2014/2020 - **al formarà une figure professionâl in stât di doprâ i struments linguistics, di marketing e di comunicazion par valorizâ, midiant de realizazion di events culturâi, il patrimoni linguistic furlan.** Ae fin dal percors al è previodût il tirocini li di un sogjet di riferiment pal setôr.

“O sin pardabon sodisfats dal interès dismovût di chest percors formatîf, che al è il prin dal so gjenar, e di vê partecipants cussì motivâts - al marche il president de ARLeF, Eros Cisilino -. Al dimostre che e je grande cussience di cemût che il furlan al puedi rapresentâ une ocasion concrete di ocupazion, creativitât e economie. Une grande part des leziuns e je dedicate ae acuisizion des competencis technichis di promoziun de lenghe furlane doprant struments dal marketing tradizional, digjitâl e web. In bande de teorie, i arlêfs a varan mût di confrontâsi ancje cu la realtât, a saran presentadis di fat tantis case history di events e progjets di comunicazion za metûts in vore de Agenzie par dâ plene atuazion ae politiche linguistiche.”

“O vin vût une rispueste ottime e a son stadis tantis lis personis interessadis ae propueste, cundut che si cjatìn intal periodi di cuarentene pal Covid-19 – a son lis peraulis di Sabina Puppo, coordinadore dal cors IRES -. I corsiscj selezionâts a son 13 arlêfs e arlevis, cun titui di studi in diversis disciplinis e une vore motivâts a tacâ un gnûf percors professionâl par jentrâ e lavorâ intal ambit de valorizazion e de promoziun de lenghe furlane”.

Al projet - coordinât dal Fonds sociâl european intal ambit de atuazion dal POR - a aderissin, in cualitât di partners, i sogjets principâi e altris ents pe promoziun e pe tutele de lenghe furlane. Di là de ARLeF, a àn dât za disponibilitât par ospitâ in tirocini i arlêfs dal cors il Cif (Centri Interdipartimentâl pal svilup de lenghe e de culture furlane de Universitât dal Friûl), il Teatri Stabil Furlan, Radio Onde Furlane, Calt sas e i Comuns di Udin, Tavagnà, Ruvigne, Cjampfuarnit e Voleson Darzin. Cun di plui, e colaborarà ae iniziative ancje la Societât Filologjiche Furlane.

Udin, ai 23 di Jugn dal 2020

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche Tel. + 39 0432 229127 / **e-mail: arlef@caltpr.it**

Adriano Del Fabro - mob. + 39 338 3245229 / Adriana Cruciatti - mob. +39 335 6853775

<<<<<<<<<<<<